



145 studentas e students dad otg chantuns da la Svizra e dal Principadi da Liechtenstein han cumenzà il semester d'atun 2013/14 a la Scuola auta da pedagogia dal Grischun.

FOTO J. DIENER

# Scola auta da pedagogia cun in nov record

■ (cp) 145 studentas e students dad otg chantuns da la Svizra e dal Principadi da Liechtenstein han cumenzà il semester d'atun 2013/14 lur scolaziun sco mussadras da scolina u sco magisters u magistras da la scola primara a la Scuola auta da pedagogia dal Grischun (SAPGR). Cun quai è il dumber da studentas e students che entschaivan il studi a la SAPGR dapli che sa dublegià dapi sia fundaziun avant 10 onns. Per l'emprima giada frequentan passa 400 studentas e students la SAPGR.

## Studentas e students che han gia in'emprima professiun

La gronda part da las novas studentas e dals novs students ha ina maturitad gimnasiala u ina maturitad spezialisada en pedagogia. En il nov onn da studi datti dentant era numerusas personas da professiun che èn rivadas a la SAPGR via la maturitad professiunala ed il curs preparatoric.

En cumparegliaziun cun l'onni avant è il dumber da studentas e students da lingua rumantscha sa diminui in pau, entant ch'il dumber da las personas da lingua taliana è restà stabil. La relaziun tranter las trais gruppas linguisticas correspunda anc adina als basegns da la scola grischuna.

## Nov studi sco magistras e magisters dal stgalim secundar I

Ultra da la scolaziun da basa per la scola primara e per la scolina han cumenzà per l'emprima giada circa quaranta magistras e magisters primars cun experientscha il studi complementar a la professiun sco persuna d'instrucziun per il stgalim secundar.

Sch'ellas ed els adempleschan las pretensiuns vegnan els a cuntanscher la stad 2016 in diplom d'instrucziun per il stgalim secundar reconuschì en l'entira Svizra. Cun questa scolaziun ch'è vegnida sviluppada en stretga colavuraziun cun la Scuola auta da pedagogia da Turitg (PHZH) reagescha la SAPGR sin la mancanza actuala da magistras e magisters sin il stgalim secundar I.

Plinavant realisescha la SAPGR ulteriuras novas scolaziuns en ils secturs talian, rumantsch u pedagogia curativa da scola. Quellas vegnan realisadas er en cooperaziun cun las scolas autas dad auters chantuns.

La SAPGR ha cun quai la finamira da mantegnair atgnas competenzas en il chantun Grischun e dad ella evitar che studentas e students ston ir a studiar en la Bassa.